

14. oktober 2016

UKA2016/45

Naalackersuisut UKA2017mut eqqumiitsuliortut suliaminnik pilersitsilertuinissaanut aningaasanik inatsimmit tunniunneqartartut pillugit aningaasaateqarfimmik pineqartunik agguaassisussatut inissinneqartussatut atugassiamik aningaasaateqarfiliornissaq anguniarlugu periarfissaasinnaasunik misissuinissamat Naalackersuisut UKA2017-imut peqquneqarnissaanik Inatsisartunut aalajangiiffigisatut siunnersuut. Misissuinermi ilanngullugu misissorneqassaaq eqqumiitsuliornermut isumalioqatigiissitamik pilersitsinissaq qulaani taaneqartunik aningaasaliissutinik agguaassinissanik ingerlatsiviusussamik piviusunnngortinneqarnissaa.

(Inatsisartunut ilaasortaq Peter Olsen, Inuit Ataqatigiit)

Inatsisartunut ilaasortap Peter Olsenip siunnersuutaanut eqqumiitsuliortortatta eqqumiitsuliornermut isumalioqatigiissitaliunneqarnissaanik, taassumallu saniatigut eqqumiitsuliortut suliaminnik pilersitsilertuinissaat pillugu aningaasaateqarfiliunneqarnissaanik Siumumiit imaattumik oqaaseqassaaq:

Nunarput kulturikkut pitsaasunik atugassaqtartitaasoq Siumup pingaartitaraa anguniagaralugulu.

Inuiaqatigiit inerisimalluartut atugarissaartullu ilisarnaatigilluinnartarpaat kulturikkut sunngiffimmilu uummaarissumik peqataalluartut. Inuiaqatigiit tamatta peqataaffissaraarput nunaqqatitta kulturikkut sunngiffimmilu peqataanissaannut pitsaanerusunik tunngavissiorinissaq nunaqqatigiittullu qaammarsaqatigiinnissaq.

Piorsarsimassutsikkut ineriartortitsineq tassaassaaq inuiaqatigiinni aallaavilik. Siumumi isumaqarpugut piorsarsimassutsimut pisortaniit aningaasaliissutaasartut Naalackersuinikkut siunertarineqartunut naapertuuttuusassat.

Nunatsinni kalaallit oqaatsitta siunissami ajunngitsumik atugaanissaat Kalaallisullu atuakkiortarne-
rup ineriartortittuarnissaa siunertaralugu Kalaallit Nunatsinni atuakkiortunngorniarfimmik pilersitsi-
soqarnissaa Siumumiit soqutigisaraarput.

Piorsarsimassutsikkut inuusaatsikkullu kalaallit oqaluttuarisaaneranni eriagisassat pingaaruteqartut najukkani ataasiakkaani katersugaasivinni, Nunatta Katersugaasiviani Allagaateqarfianilu, atuagaa-
teqarfiillu allat aqutigalugit tammatsaalineqassapput. Nunatsinni eriagisassanik misissuisinnaaneq
periarfissagissaarnerussaaq. Nunatsinni eriagisassat ajornannginnerusumik periarfissaqarluni ilinni-
artunit atuartunillu misissorneqarsinnaalissapput.

Eqqumiitsuliortut, sanaaluttartut, atuakkiortut nipilersortartullu suliaminnut atatillugu pikkorissartinneqartassapput, suliaminnillu ingerlatsiffissaannik ineriartortitsisoqassalluni. Namminersorlutik Oqartussat Katuamut tapeeqataasernerat aqutugalugu annertunerusumik periarfissiisoqassaaq sinerissamut Katuap aaqqissugaanik siammaterisarnissaq. Nunani avannarlermiut naggueqativullu annertunerusumik kulturikkut suleqatiginerussavagut.

Eqqumiitsuliorneq, isiginnaartitsineq, nipilersorneq, erinarsorneq allatigullu kulturikkut inerisitsiniarluni suliaqartarnerit Siumup ukiorpanni atuuffiini illersugariuarsimavaa. Taamaattumik aamma Siumut naalackersueqataasarsimanerani ukiuni atuuffiini eqqumiitsuliortunut ikorfartuuarneq ingerlassimallugu sulilu ingerlallugu.

Siumumiit maluginiarparput eqqumiitsuliornermik soqutigisallit kattuffii peqatigalugit Naalackersuisut periarfissanik pitsanngorsaataasussanik, matumunnga siunnersuummut assingusinnaasunik periarfissarsiuussinissaminnut suliaqarnissamik oqariartuuteqarnerat. Tamannalu aamma isumalluarnartutut isigaarput. Piorsarsimassutsimmi nukittunerpaaffissaaniinnissaa Siumumiit pingaartilluinnaratsigu isuma tapersorsorparput.

Taamatutaaq periarfissat allat, assersuutugalugu Tipsernermi Lottornermilu sinneqartoorutinit agguaasarnernit nalunngilagut immikkut eqqumiitsuliornermik imaluunniit allanik kulturikkut suliaqarnermi ingerlatsinermut tapiissuteqartartut.

Taamatut tunngavilersorluta Inatsisartunut ilaasortap Peter Olsenip siunnersuuteqarneranut qujavugut. Suliallu ataatsimiitsitaliami misissoqqissaarneqarnissaat periarfissaasullu allat qanoq isikkoqarnerat inassutugalugu siunnersuut Kultureqarnermut ataatsimiitsitaliami aappassaaneerneqartinnani sukumiisumik suliarineqarnissaa inassutigaarput.

Ineqi Kielsen
Siumut